

Qalam

Bilangan 40- November 1953- Safar 1373- 60 Sen

Menghukum Orang Menceraikan Isteri

Di Kedah dikatakan telah timbul suatu ura-ura hendak mengadakan suatu undang-undang untuk menghukum seseorang suami yang menceraikan isterinya dengan tidak mempunyai sebab-sebab yang difikirkan layak. Sebab-sebab ura-ura itu timbul adalah dipercayai terbitnya kerana memandang bahawa perceraian di antara seorang suami dan isterinya di dalam lingkungan orang-orang Islam dari sehari ke sehari semakin bertambah.

Sekali pandang, perkara ini, tidaklah akan ada salahnya tetapi apabila kita halusi dengan adanya peraturan-peraturan agama tentang menyelenggarakan perkara ini maka rasanya tidaklah payah diadakan lagi sesuatu undang-undang sekiranya undang-undang atau peraturan Islam yang telah tertaja itu dijalankan atau diamalkan.

Sebagaimana umum telah mengetahui bahawa perkahwinan itu ialah suatu perkara yang sangat-sangat digalakkan oleh Allah. Dengan perkahwinan itu dapat dijauhi perkara-perkara yang tidak digemari seperti zina dan seumpamanya yang menjadikan seseorang itu liar daripada rumah tangganya. Sebaliknya pula telah kita ketahui, mengingat kepada keadaan-keadaan tabiat manusia maka Allah tidak mengikat perkahwinan itu dengan suatu ikatan yang tidak boleh dipecah dan sebab itulah perceraian diluluskan tetapi dipandang sebagai suatu perkara yang sangat tidak digemari.

Dengan sebab itulah maka di dalam perkahwinan itu dikehendaki adanya ketenangan di antara kedua-dua pihak – kedua-duanya hendaklah berlebih berkangur. Kalau terbit pula perbalahan di antara kedua-duanya maka seseorang suami itu

hendaklah menasihati isterinya, kalau tidak berjaya nasihatnya itu, hendaklah memulaukannya (tidak campur tidur) iaitu menepati kata pepatah: “sayang isteri tinggal-tinggalkan”. Kalau tidak juga berjaya, hendaklah ia memulaukannya dengan suatu pukulan sekadar menunjukkan tanda marah-bukan sebagai pukulan yang menyakitkan.

Jika keadaan ini tidak memberi kesan maka haruslah perkara ini disampaikan kepada kedua-dua ibu bapanya dan jika tidak ju terurus dengan sempurna baharulah perkara itu dibawa ke hadapan kadi, kadi tidak boleh membuat sekehendak-hendak hatinya sahaja ia diwajibkan menyiasat dan menasihat, dan menerangkan bahawa sesuatu cerai yang dalam kemarahan itu tidak sah. kadi diwajibkan seberapa daya upayanya mengamankan di antara keduanya dan jika tidak dapat diamankan maka baharulah ia dibenarkan melantik dua orang hakim, yakni wakil-wakil di antara keduanya.

Jika usaha ini tidak berjaya maka baharulah dibenarkan mereka itu dipisahkan, itu pun disuruh supaya dalam masa, itu diberi cerai dengan sesuatu cara yang baik, sebagaimana juga ia mengambilnya dahulu dengan baik. Kemudian dalam masa menunggu ‘idahnya ia tidak boleh dihalau daripada rumah itu.

Melihat hal-hal yang tersebut di atas maka zahir kepada kita bahawa tiap-tiap seseorang adalah ditunjukkan peraturan-peraturannya di dalam menyelenggarakan perselisihan rumah tangganya dan zahir juga di dalamnya bagaimana kewajipan-kewajipan kadi di atasnya iaitu mereka tidak dibenarkan apabila datang seseorang suami hendak menceraikan isterinya terus sahaja diterima tetapi hendaklah diingatkan dan dinasihati serta dicerai ikhtiar-ikhtiar yang secukup-cukupnya untuk mengamankan mereka.

Menurut pandangan kita inilah sahaja suatu cara yang boleh mengurangkan cerai itu. Jabatan-jabatan agama di dalam tiap-tiap buah negeri itu wajib menerangkan dengan sejelas-jelasnya cara ini kepada kadi-kadi yang mas’ūl di dalamnya. Kepada

mereka hendaklah ditunjukkan cara yang sebenar serta bagaimana tanggungan-tanggungan mereka di dalam perkara ini.

Sekiranya diadakan hukuman-hukuman denda atau penjara kepada seseorang suami yang mencerai isterinya maka yang demikian menurut pendapat kita adalah menyalahi kehendak-kehendak dan peraturan-peraturan agama bahkan menambahkan lagi kepada undang-undang Islam yang ada. Ia akan menyalahi pula kepada keluasan Allah atas cerai-yakni agama Islam itu tidak mengikat sesuatu perkahwinan yang tidak boleh dipisahkan kerana yang demikian adalah menyalahi tabiat kejadian manusia.

Untuk mengurangkan perceraian itu tidak lain hanyalah tiap-tiap kadi yang mas'ūl di dalamnya mengetahui tanggungjawab dan kewajipannya atas jawatannya.

* * *

Hikmah Syari'at

Terbit daripada perkara-perkara cerau di Singapura yang tiap-tiap tahun itu tidak kurang banyaknya maka suatu ura-ura hendak mengadakan mahkamah syariah di sini telah ada. Rancangan itu khabarnya telah dibawa dan dibahas oleh majlis penasihat Islam dan rangka-rangkanya telah pun siap tetapi perkara yang timbul daripadanya sekarang iaitu siapakah yang akan menanggung perbelanjaan mahkamah itu kelak – adakah orang Islam atau pun kerajaan.

Mengingat kepada perkara ini adalah perkara am yang mengenai juga banyak penduduk di sini maka mengadakan suatu mahkamah syariah yang bakal mengurus hal-hal mereka itu adalah sangat mustahak sebab yang demikian itu kerap kali juga membangkitkan perkara-perkara yang merosak kepada keamanan dan di sebalik itu dapatlah perkara-perkara orang-orang Islam itu dibawa di hadapan orang-orang Islam sendiri mengikut hukuman-hukuman terutama di dalam perkara nikah kahwin dan pembahagian harta pusaka.

Dengan kerana ia suatu perkara am menurut pandangan kita perkara ini wajib diselenggarakan oleh kerajaan dan kerajaan wajib mengadakannya. Perkara ini sepatutnya tidak ditinggalkan begitu sahaja. Bahkan hendaklah dibawa

kepada timbangan kerajaan oleh orang-orang Islam yang duduk di dalam majlis mesyuarat negeri.

* * *

Muktamar Islam di Tenggara Asia

Suatu persiapan telah dibuat untuk mengadakan muktamar Islam yang kedua yang dicadangkan diadakan di Kuala Lumpur oleh penaja-penajanya iaitu Jami'ah al-Da'wah al-Islāmiyyah. Muktamar yang pertama telah diadakan di Singapura lebih kurang dua tahun dahulu semasa penganjurnya Mawlana 'Abd al-'Alīm al-Ṣiddīqī ada di sini.

Kita telah pun menulis di sini tentang apakah natijah atau faedah muktamar yang sebegini besar bunyinya kepada kita itu. Dengan membandingkan kepada belanja-belanja yang dikeluarkan kerananya. Apa yang kita sebut itu tidak dapat dinafikan kebenarannya kerana daripada masa itu hingga sekarang tidak ada sesuatu pun yang dapat kita lihat buahnya. nampaknya ura-ura tinggal ura-ura – habis mesyuarat ura-ura itu tinggal rancangan di atas kertas, tidak terlepas barang sedikit juar pun.

Kita mendengar heboh pada masa itu hendak menubuhkan sebuah syarikat perniagaan Islam yang bermodal bermillion-million ringgit – akuan-akuan menyokong banyak timbul tetapi sesudah tuan 'Abd al-'Alīm meninggalkan Malaya maka rancangan itu pun masuk pula ke dalam laut – tidak terdengar lagi khabar beritanya.

Dengan keadaan-keadaan yang sedemikian itu maka apakah faedahnya sesuatu muktamar yang sebegini besar bunyinya sedang tidak memberi sesuatu manfaatnya kepada umat Islam selain daripada mengambil sesuatu keputusan yang tidak dapat diselenggarakan?

Kita tetap berpendapat mengatakan bahawa muktamar yang besar itu tidak ada gunanya diadakan – pekerjaan yang lebih dan banyak untuk diselenggarakan oleh umat Islam di sini masih banyak tetapi tidak dibuat dan diselenggarakan dengan secukupnya oleh penaja pertubuhan itu. Kita masih memandang bahawa habis mesyuarat maka habislah ia sedang faedahnya tidak didapati sedang wang dan masa habis begitu sahaja.